



**REPUBLIKA E SHQIPËRISË
KONTROLLI I LARTË I SHTETIT
KRYETARI**

Nr. 810/5 Prot.

Tiranë, më 15.04.2021

VENDIM

Nr. 45, Datë 15.04.2021

PËR

**AUDITIMIN TEMATIK TË USHTRUAR MINISTRINË E ARSIMIT, SPORTIT DHE
RINISË “MBI AUDITIMIN E PËRPUTHSHMËRISË”
për periudhën nga data 01.01.2018 deri më datën 31.08.2020.**

Nga auditimi tematik, i ushtruar në Ministrinë e Arsimit, Sportit dhe Rinisë në zbatim të Programit të Auditimit nr.810/1 datë 01.09.2020, me objekt “Auditim Përputhshmërie”, në lidhje mbi procedurat, kriteret e ndjekura për njohjen dhe njësimin e certifikatave, diplomave, gradave shkencore dhe titujve akademikë, të fituara jashtë vendit, për periudhën 01.01.2018 deri në 31.08.2020, u evidentuan raste me boshllëqe të kuadrit ligjor dhe rregullator në fuqi si dhe procedura jo të përhapura, që nën gjykimin profesional të audituesit të pavarur, nuk janë në përputhje në të gjitha aspektet materiale me kriteret e aplikuar.

Pasi u njoha me Raportin Përfundimtar të Auditimit dhe Projektvendimin e paraqitur nga Grupi i Auditimit të Departamentit të Auditimit të Institucioneve Qendrore, shpjegimet e dhëna nga subjekti i audituar, si dhe vlerësimet mbi objektivitetin dhe cilësinë e auditimit nga Drejtori i Departamentit të mësipërm, Drejtori i Drejtorisë së Standardeve dhe Sigurimit të Cilësisë dhe Drejtori i Përgjithshëm, në mbështetje të neneve 10, 15, 25 dhe 30, të ligjit nr. 154/2014 miratuar në datën 27.11.2014 “Për Organizimin dhe Funksonimin e Kontrollit të Lartë të Shtetit”.

VENDOSA

I. Të miratoj Raportin Përfundimtar të Auditimit tematik, i ushtruar në Ministrinë e Arsimit, Sportit dhe Rinisë, sipas Programit të Auditimit nr.810/1 datë 01.09.2020, me objekt “Auditim Përputhshmërie”, në lidhje mbi procedurat, kriteret e ndjekura për njohjen dhe

njësimit e certifikatave, diplomave, gradave shkencore dhe titujve akademikë, të fituara jashtë vendit, për periudhën 01.01.2018 deri në 31.08.2020.

II. Të miratoj rekomandimet për përmirësimin e gjendjes dhe të kërkoj marrjen e masave sa vijon:

A. PROPOZIME PËR NDRYSHIME APO PËRMIRËSIME NË LEGJISLACIONIN NË FUQI

1. Gjetje nga auditimi:

-Sipas ligjit nr.80/2015 “Për arsimin e lartë dhe kërkimin shkencor në institucionet e arsimit të lartë në Republikën e Shqipërisë” neni 92, sanksionon, njohjen dhe njësimin e diplomave, certifikatave dhe gradave të fituara, nga studimet të kryera jashtë vendit që i përkasin niveleve nga 5 deri në 8, të Kornizës Shqiptare të kualifikimeve, është detyrim i Ministrisë së Arsimit, Sportit dhe Rinisë (MASR) si dhe kriteret për njohjen dhe njësimin përcaktohen me udhëzim të ministrit përgjegjës për arsimin, duke respektuar marrëveshjet ndërkombëtare të nënshkruara nga vendi ynë për këtë qëllim.

-Sipas ligjit nr. 80/2015 “Për arsimin e lartë dhe kërkimin shkencor në institucionet e arsimit të lartë në Republikën e Shqipërisë” bazuar në nenet 9,10 QSHA ndër të tjera, ofron çdo shërbim tjetër të ngarkuar nga ministri përgjegjës për arsimin.

Në vijim u konstatua se, aktet administrative të miratuara nga Ministri i MASR, në funksion të ligjit të mësipërm, për çështjen objekt i këtij auditimi, paraqesin problematikat si më poshtë vijon:

-Udhëzimi i Ministrit të Arsimit, nr.17 datë 03.08.2016, “Për procedurat dhe kriteret për njohjen dhe njësimin në Republikën e Shqipërisë, të diplomave, certifikatave, gradave shkencore dhe titujve akademikë, të lëshuara nga institucionet e huaja të arsimit të lartë dhe institucioneve të tjera të autorizuar, jashtë vendit”, i ndryshuar (i cili ka pësuar disa herë ndryshime të pjesshme, konkretisht me udhëzimet, nr. 32 datë 29.12.2017; nr.15 datë 16.04.2018; nr.5 datë 21.02.2019; nr.30 datë 30.12.2019); si dhe Udhëzimi i Ministrit të Arsimit, nr.8 datë 13.03.2017 “Për organizimin dhe funksionimin e Qendrës së Shërbimeve Arsimore QSHA”, kanë bërë të mundur që, MASR të marrë me pa të drejtë kompetencën për transferimin e këtij detyrimi QSHA-së, në një kohë që këtë kompetencë e ka Këshilli i Ministrave. QSHA ndër të tjera, ofron çdo shërbim tjetër të ngarkuar nga ministri përgjegjës për arsimin sipas ligjit nr. 80/2015 “Për arsimin e lartë dhe kërkimin shkencor në institucionet e arsimit të lartë në Republikën e Shqipërisë” neni 9 pika 4, por nga ana tjetër QSHA është krijuar dhe funksionon në bazë të VKM nr. 1013 datë 10.12.2010 “Për krijimin e Agjencisë Kombëtare të Provimeve” i ndryshuar me VKM nr. 371, datë 26.04.2017, ku në asnjë pikë të kornizës ligjore, nuk ka të miratuar detyrimin juridik funksional, për njohjen dhe njësimin në Republikën e Shqipërisë, të diplomave, certifikatave, të lëshuara nga institucionet e huaja të arsimit të lartë dhe institucioneve të tjera të autorizuar, jashtë vendit.

-Udhëzimi nr.15 datë 16.04.2018, “Për disa shtesa dhe ndryshime, në Udhëzimin nr. 17, datë 03.08.2016, për procedurat dhe kriteret për njohjen dhe njësimin në Republikën e Shqipërisë, të diplomave, certifikatave, gradave shkencore dhe titujve akademikë, të lëshuara nga institucionet e huaja të arsimit të lartë dhe institucioneve të tjera të autorizuar, jashtë vendit”,

i ndryshuar, sipas Kreut II, i ka njohur të drejtën QSHA-së, të realizojë procedurën vetëm për njohjen dhe njësimin e diplomave, certifikatave, të fituara jashtë vendit, *ndërsa* procedura për njohjen dhe njësimin e gradave shkencore dhe titujve akademikë, realizohet nga MASR, me anë të strukturave jo permanente - sekretariati teknik në bashkëpunim me komisionet ad hoc, të cilat miratohen kohë mbas kohe me Urdhër të Ministrit të Arsimit, në mbështetje të ligjit nr.80/2015 “Për arsimin e lartë dhe kërkimin shkencor në institucionet e arsimit të lartë në Republikën e Shqipërisë” neni 92 , pasi Sektori i Njohjes së Diplomave në MASR është suprimuar me Urdhër të Kryeministrit nr.163, datë 05.10.2017 “Për miratimin e strukturës dhe organikës së Ministrisë së Arsimit, Sportit dhe Rinisë”.

- Udhëzimi nr.17 datë 3.8.2016, “Për procedurat dhe kriteret për njohjen dhe njësimin në Republikën e Shqipërisë, të diplomave, certifikatave, gradave shkencore dhe titujve akademikë të lëshuar nga institucionet e huaja të arsimit të lartë dhe institucione të tjera të autorizuara, jashtë vendit”, i ndryshuar, Kreu IV, pika 4.1 parashikon njohjen e diplomave, certifikatave, gradave shkencore dhe titujve akademikë, edhe pa vulë apostile, për verifikimin e autenticitetit të diplomave, certifikatave dhe gradave shkencore. Mosekzistenca e këtij elementi, ul efikasitetin e sistemeve të kontrollit si dhe lë shteg për abuzime të ndryshme.

-Udhëzimi nr.15 datë 16.04.2018, i ndryshuar, nuk ka në përmbajtje, datën e fillimit të ushtrimit të kompetencave në QSHA, por shprehet se, hyn në fuqi 15 ditë pas botimit në fletoren zyrtare, kreu VIII (Dispozita të fundit) pika 2. Nga auditimi u konstatua se, botimi është bërë më datë 26.04.2018 në fletoren zyrtare nr. 59/2018, ndërsa procesi i njësimit të diplomave është transferuar në QSHA nga MASR, në muajin shtator 2018, duke sjellë “mbivendosje të strukturave”, pasi deri në shtator 2018, këtë funksion e ka realizuar sekretariati teknik pranë MASR.

-Udhëzimi nr.17 datë 03.08.2016 i ndryshuar, nuk ka të përcaktuar, numrin minimal të depozitimeve të dosjeve të aplikimeve të gradave shkencore pranë “sekretariatit teknik” si dhe nuk ka të përcaktuar, afatet/kohën që i duhet komisionit ad hoc dhe sekretariatit teknik, për shqyrtimin e dokumentacionit, pasi konstatuam raste që aplikantët kanë dorëzuar dokumentacionin, dhe vendim marrja për njohje/njësimit, është bërë mbas disa muajve.

-MASR dhe QSHA, nuk kanë ndërmarrë asnjë veprim juridik, për të iniciuar hartimin dhe miratimin e akteve nënligjore, në përputhje me ndryshimet e mësipërme.

Veprimet e mësipërme janë në kundërshtim, me ligjin nr. 80/2015 “Për arsimin e lartë dhe kërkimin shkencor në institucionet e arsimit të lartë në Republikën e Shqipërisë” nenet, 9, 10 dhe 92, me ligjin nr.90/2012 “Për organizimin dhe funksionimin e administratës shtetërore” neni 6 (institucione varësie), me VKM nr.560 datë 29.09.2018 “Për caktimin e tarifave për shërbimet e ofruara nga QSHA” dhe me Urdhër të Kryeministrit nr.146, datë 28.09.2018 “Për miratimin e strukturës dhe të organikës së Qendrës së Shërbimeve Arsimore”.

Më hollësisht trajtuar në pikën (2.1) faqe (16-26) të Raportit Përfundimtar të Auditimit.

1.1 Rekomandimi:

- Ministria e Arsimit, Sporteve dhe Rinisë si ministria përgjegjëse në bashkëpunim me Qendrën e Shërbimeve Arsimore, të iniciojnë pranë Këshillit të Ministrave ndryshimet e VKM-së nr.371, datë 26.04.2017 “Për disa ndryshime në VKM nr.1013, datë 10.12.2010, të KM, “Për krijimin e Agjencisë Kombëtare të Provimeve”, për të bërë të mundur njohjen juridike, funksionale për atributin në fjalë nga QSHA, si struktura që realizon shërbimin e

njohjes dhe njësimit e diplomave, certifikatave, të lëshuara nga institucionet e huaja të arsimit të lartë dhe institucioneve të tjera të autorizuar, jashtë vendit.

- Ministria e Arsimit, Sporteve dhe Rinisë, si ministria përgjegjëse, në bazë të rolit që ka sipas ligjit të arsimit të lartë, të marrë masa për shfuqizimin e Udhëzimit nr.17, datë 03.08.2016, “Për procedurat dhe kriteret për njohjen dhe njësimit në Republikën e Shqipërisë, të diplomave, certifikatave, gradave shkencore dhe titujve akademikë, të lëshuara nga institucionet e huaja të arsimit të lartë dhe institucioneve të tjera të autorizuar, jashtë vendit”, i ndryshuar dhe Udhëzimit të Ministrit të Arsimit nr.8 datë 13.03.2017 “Për organizimin dhe funksionimin e Qendrës së Shërbimeve Arsimore”, duke hartuar dhe miratuar udhëzime që t’i shërbejnë përcaktimit të kriterëve dhe procedurave, të njohjes dhe njësimit e diplomave, certifikatave, të lëshuara nga institucionet e huaja të arsimit të lartë dhe institucioneve të tjera të autorizuar, jashtë vendit.

- Ministria e Arsimit, Sporteve dhe Rinisë, në hartimin e udhëzimit të ri, të vendoset si detyrim procedura e vulës apostile për njësimit e të gjitha akteve (certifikata, diploma dhe grada shkencore dhe titujve akademikë), të fituara jashtë vendit, me qëllim forcimin e elementëve të vërtetësisë të dokumentave që do të njësohen.

Deri në 3 muaj

B. MASA ORGANIZATIVE

1. Gjetje nga auditimi:

Qendra e Shërbimeve Arsimore, funksionon me Rregullore të brendshme nr.1462 prot datë 02.09.2014, miratuar nga Ministri i Arsimit dhe Sportit, e cila nuk reflekton ndryshimet e strukturës sipas Urdhrit të Kryeministrit nr.146, datë 28.09.2018 “Për miratimin e strukturës dhe të organikës së Qendrës së Shërbimeve Arsimore”, ndonëse nga QSHA me shkresën nr. 580 prot., datë 30.01.2019, është dërguar për miratim në MASR, Draft- Rregullore e brendshme, e cila nuk është miratuar nga titullari i MASR.

Veprimi i mësipërm është në kundërshtim, me ligjin nr. 10296 datë 08.07.2010 “Për menaxhimin financiar dhe kontrollin” i ndryshuar neni 20.

Më hollësisht trajtuar në pikën (2.1) faqe (18-20) të Raportit Përfundimtar të Auditimit.

1.1 Rekomandimi:

Qendra e Shërbimeve Arsimore, mbas finalizimit të miratimit të VKM-së për njohjen juridike dhe funksionin e atributit të shërbimit për njohjen dhe njësimit e diplomave, certifikatave, të lëshuara nga institucionet e huaja të arsimit të lartë dhe institucioneve të tjera të autorizuar, jashtë vendit, të marrë masa të propozojë për miratim, rregulloren e re të brendshme të saj, pranë Ministrisë së Arsimit, Sportit dhe Rinisë duke reflektuar ndryshimet.

Menjëherë dhe në vijimësi

2.Gjetje nga auditimi:

Nga auditimi u konstatua se, MASR dhe QSHA, për dosjet e aplikimeve për njësimit/njohje të certifikatave/diplomave dhe gradave shkencore, për të cilat janë përfunduar procedurat përkatëse, kanë vetëm një bazë të dhënash të posaçme, që përmban të dhëna specifike të

secilës prej dosjeve të aplikimit, por këto dosje nuk rezultuan të jenë të numëruara sipas inventarit dhe të arkivuara pranë sektorit të arkiv-protokollit, kjo në kundërshtim me ligjin nr. 9154 datë 06.11.2003 “Për arkivat” i ndryshuar, nenet 24, 36/1, 37, 39 si dhe rregullave të caktuara nga Drejtoria e Përgjithshme e Arkivave për evidencimin, sistemimin dhe shfrytëzimin e dokumenteve, me qëllim vendosjen e sanksioneve për personat e ngarkuar me përgjegjësi.

Më hollësisht trajtuar në pikën (2.2) faqe (31-34) të Raportit Përfundimtar të Auditimit.

2.1 Rekomandimi:

Me qëllim respektimin e rregullave të parashikuara për ruajtjen dhe shfrytëzimin e pasurisë arkivore, nga ana e Ministrisë së Arsimit, Sportit dhe Rinisë dhe Qendrës së Shërbimeve Arsimore, të merren masa për kryerjen e inventarizimit dhe arkivimit të dosjeve për të cilat janë përfunduar procedurat përkatëse në mënyrë që çdo dokument i administruar nga ky institucion të ketë të gjithë elementët e dokumenteve sipas normave tekniko-profesionale dhe metodologjike të shërbimit arkivor.

Menjëherë dhe në vijimësi

3. Gjetje nga auditimi:

Nga auditimi u konstatua se, në bazë të Urdhrit të Kryeministrit nr.163 datë 05.10.2017 “Për miratimin e strukturës dhe organikës së Ministrisë së Arsimit, Sportit dhe Rinisë”, është suprimuar Sektori i njohjes së diplomave/gradave shkencore, sektor që deri në momentin e hartimit të këtij dokumenti nuk ekziston, për rrjedhojë detyrën e realizon sekretariati teknik, ku anëtarë janë specialistë të emëruar në detyra të tjera funksionale, por që kryejnë dhe këtë detyrim shtesë, për të cilin as nuk vlerësohen nga eprori direkt, kjo në kundërshtim ligjin nr.152/2013 “Për nëpunësin civil” neni 62. Gjithashtu, komisionet ad hoc dhe sekretariati teknik, ngrihen kohë mbas kohë, me urdhër të titullarit të MASR, pra këto “struktura” nuk janë permanente. Mungesa e një strukture permanente dhe për më tepër angazhimi në komisioni i anëtarëve (profesor, pedagogë, ekspertë, etj) kundrejt asnjë pagese dhe detyrimi, ka bërë që të ketë pasur raste që anëtarë të komisioneve ad hoc, për arsye të ndryshme, profesionale nuk kanë mundur të jenë pjesëmarrës në kohë, edhe pse ky fakt nuk e ka penguar vendimmarrjen e njohjes së gradave/titujve shkencorë.

Më hollësisht trajtuar në pikën (2.2) faqe (27-28) të Raportit Përfundimtar të Auditimit.

3.1 Rekomandim:

MASR, në bashkëpunim me Departamentin e Administratës Publike, ose të shikojë mundësinë e krijimit të strukturës për njohjen së gradave shkencore brenda MASR-së, ose transferimin e këtij shërbimi pranë Qendrës së Shërbimeve Arsimore. Nëse dakordësohet që kjo strukturë të qëndrojë si pjesë e MASR, nevojitet që të përcaktohen qartë detyrat funksionale të sekretariatit teknik dhe komisioneve ad hoc, në mënyrë që të përmirësohet detyrimi i MASR, në respektim të marrëveshjeve ndërkombëtare të nënshkruara nga vendi ynë për këtë qëllim, si dhe në përmbushje të kërkesave të qytetarëve.

Menjëherë

4. Gjetje nga auditimi:

Për njohjen/njësimin e gradës shkencore, strukturat jopermanente - sekretariati teknik në bashkëpunim me komisionet ad hoc, në asnjë referencë ligjore/nënligjore, nuk kërkohet të

merret konfirmim zyrtar pranë Ministrisë së Arsimit, të shtetit të huaj. Në përgjithësi, MASR ka mbajtur standardin e mësipërm, ndërsa, për njohjen/njësimin e gradës shkencore të tre rasteve, të aplikuar në korrik 2017, të cilët kanë mbaruar studimet në Universitetin Ndërkombëtar të Strugës (UNS) në Maqedoninë e Veriut, në vitet 2016 dhe 2017, nga ana e sekretariatit teknik dhe komisionit ad hoc, janë mbajtur dy standarde, si vijon:

- Sekretariati teknik, ka përdorur formën e komunikimit me email, në mbështetje të Udhëzimit nr.17 datë 03.08.2016, i ndryshuar, Kreu IV, pika 4.1, duke i kërkuar informacion për vlerësim objektiv për njohjen dhe njësimin e gradës shkencore, pranë UNS, më datë 07.09.2017 dhe më datë 21.05.2020. Në të dy rastet, është kthyer përgjigje miratuese si nga Universiteti Ndërkombëtar i Strugës si dhe në rastin e dytë është marrë edhe një përgjigje me email nga Drejtoria e Arsimit të Lartë të Ministrisë së Arsimit e Shkencës në Maqedoninë e Veriut, e cila në këtë rast shërben dhe si qendra e rrjetit evropian të informimit dhe njohjes së diplomave (ENIC-NARIC) mbi statusin e institucioneve të arsimit të lartë.

-Komisionet ad hoc, të ngritur, me urdhrin e Ministrit të MASR nr.644, datë 15.12.2017 dhe me urdhrin nr.151 datë 01.06.2020 me objekt “Për ngritjen e Komisionit ad hoc për kryerjen e procedurave në marrjen e vendimit mbi njohjen e gradave shkencore dhe titujve akademikë të fituar jashtë vendit”, në procesverbalet respektivë me nr.1 datë 19.02.2018 dhe nr. 2 të datës 12.06.2020, shprehen se përgjigjet me email konsiderohen të pamjaftueshme për të dalë në një vendim përfundimtar negativ apo pozitiv (konfirmuar ky fakt me shkresën nr.3013/1 prot datë 13.07.2020 të MARS) dhe për rrjedhojë kanë vendosur të kërkojnë zyrtarisht pranë Ministrisë së Arsimit të Maqedonisë së Veriut, lidhur me vlefshmërinë e disa diplomave të studimit të ciklit të tretë, për rastet e sipërpërmendur.

Vlen të theksohet se nga MASR, deri në momentin e hartimit të materialit të auditimit, grupit nuk ju vunë në dispozicion praktikat zyrtare të dërguara pranë Ministrisë së Arsimit dhe Shkencës në Maqedoninë e Veriut, por i është vënë praktika me shkresë nr.3072 prot datë 28.02.2019 që Ministria për Evropën dhe Punët e Jashtme (Shqiptare), ka përcjellë materialin e zyrës së Ambasadës Shqiptare në Shkup, nëpërmjet Ministrisë së Jashtme e Maqedonisë së Veriut dhe jo nëpërmjet Ministrisë së Arsimit Shkencës së Maqedonisë së Veriut. Kjo formë komunikimi nuk është e përcaktuar në Udhëzimit nr.17 datë 03.08.2016, i ndryshuar, Kreu IV, pika 4.1. Gjithashtu, në procesverbalet, nuk është dhënë asnjë arsytim, pse duhej të kërkohej zyrtarisht pranë Ministrisë së Arsimit të Maqedonisë së Veriut apo të merrej informacion pranë zyrës së Ambasadës Shqiptare në Shkup, ndryshe nga praktikat e njohjes me vendet e ndryshme të huaja, duke vënë në dyshim vërtetësinë e marrjes së gradës shkencore si dhe a ka të drejtë Komisioni ad hoc, të shikojë legjislacionin e huaj apo të mbështetet në detyrimin ligjor që ka Ministria e Arsimit në Republikën e Shqipërisë, sipas Udhëzimit nr.17 datë 03.08.2016, i ndryshuar, pasi në praktikat e audituara për aplikantë të ndryshëm të cilët që kanë studiuar në vende të ndryshme të huaja për nivelin e 8, nuk është ndjekur kjo formë komunikimi, por vetëm me email pranë universiteteve apo pranë qendrës (ENIC-NARIC).

-Gjithashtu, nga auditimi, duke krahasuar një praktikë tjetër të ngjashme, me praktikën e tre rasteve të konstatuara më lartë për njohje, ku studimet janë kryer në të njëjtin universitet, komisioni ad hoc i ngritur me Urdhrin nr.106 datë 25.02.2019 “Për ngritjen e Komisionit ad hoc për kryerjen e procedurave në marrjen e vendimit mbi njohjen e gradave shkencore dhe titujve akademikë të fituar jashtë vendit”, i ka njohur/njësuar gradën “doktor”, në mungesë të shkresës zyrtare nga Ministria e Arsimit të Maqedonisë së Veriut, duke u bazuar në

informacionin e dhënë nga Ministria e Jashtme e Maqedonisë së Veriut nëpërmjet Ambasadës së Republikës së Shqipërisë në Maqedoninë e Veriut, kjo jo në përputhje me Udhëzimin nr.17 datë 03.08.2016, i ndryshuar.

Më hollësisht trajtuar në pikën (2.2) faqe (28-31) të Raportit Përfundimtar të Auditimit.

4.1. Rekomandim:

Nga ana e MASR, të merren masa për zgjidhje të menjëhershme, të realizimit të vendimmarrjes, pasi janë kaluar afatet (deri tani ka marrë 3 vjet), duke cenuar mbrojtjen e interesave të shtetasve shqiptarë.

Menjëherë

C. TË TJERA

Në kushtet kur:

- arkëtimi i tarifave nga shërbimet e njohjes dhe njësimit të diplomave/gradave nuk analizohet i plotë;

-nuk është reflektuar në këtë Raport Përfundimtar një analizë e detajuar mbi ecurinë e proceseve të njohjes dhe të njësimit (*sa procedura gjithsej /nga këto sa audituar/nga këto sa konstatuar shkelje/ dhe konkretisht cfare shkeljesh*), veç për QSHA-në dhe veç për MASR-në, në mënyrë që të krijohet një pamje më e plotë e këtij aktiviteti dhe procedurave të ndjekura;

Vlerësojmë se, auditimi në MASR/QSHA mbi përputhshmërinë e veprimtarisë së tyre, me kuadrin ligjor dhe rregullator në fuqi, në lidhje mbi procedurat, kriteret e ndjekura për njohjen dhe njësimin e certifikatave, diplomave, gradave shkencore dhe titujve akademikë, brenda dhe jashtë vendit si dhe auditimi i plotë i sistemeve të kontrollit, përgjatë këtij procesi përfshirë edhe sistemet IT, do të jetë një drejtim i veçantë në auditimin e radhës që KLSH do të zhvillojë në MASR.

Me ndjekjen dhe kontrollin e zbatimit të detyrave dhe masave të përcaktuara në këtë vendim ngarkohet Departamenti i Auditimit të Institucioneve Qendrore. Ky vendim përcillet në formë rekomandimi në subjektin e auditimit.

K R Y E T A R

ARBEN SHEHU